

UDHËZIM
Nr.111, datë 8.4.2010

PËR MËNYRËN E ADMINISTRIMIT TË GJOBAVE TË VËNA NDAJ KUNDËRVAJTËSVE
NGA SHËRBIMET E POLICISË RRUGORE DHE PATRULLËS SË PËRGJITHSHME

Në mbështetje të pikës 4 të nenit 102 të Kushtetutës, të pikës 2, shkronja “c” të nenit 7 të ligjit nr.9749, datë 4.6.2007 “Për Policinë e Shtetit”, të ligjit nr.9936, datë 26.6.2008 “Për menaxhimin e sistemit buxhetor në Republikën e Shqipërisë”, të pikës 3 të nenit 203 dhe të nenit 205 të ligjit nr.8378, datë 22.7.1998 “Kodi Rrugor i Republikës të Shqipërisë”, të pikës 1 të nenit 353, të pikës 3, të nenit 355 dhe të pikës 2 të nenit 359 të “Rregullores së zbatimit të Kodit Rrugor të Republikës së Shqipërisë”, miratuar me vendimin e Këshillit të Ministrave nr.153, datë 7.4.2000, me qëllim saktësimin e procedurave për administrimin më të mirë të gjobave të vëna ndaj kundërvajtësve nga shërbimet e Policisë Rrugore dhe patrullës së përgjithshme,

UDHËZOJ:

1. Për kundërvajtjet e konstatuara, punonjësi i Policisë Rrugore apo i patrullës së përgjithshme plotëson procesverbalin e konstatimit të shkeljes, sipas kërkesave të modelit që përmban “Rregullorja e zbatimit të Kodit Rrugor të Republikës së Shqipërisë”, miratuar me vendimin e Këshillit të Ministrave nr.153, datë 7.4.2000. Një kopje e procesverbalit të konstatimit të shkeljes i jepet kundërvajtësit, duke e adresuar për të kryer pagesën në arkat e operatorëve financiarë.

2. Arkëtimi i gjobave të bëhet nga kundërvajtësit në arkat e operatorëve financiarë që veprojnë në Republikën e Shqipërisë, duke respektuar procedurat ligjore përkatëse për përfitimin e shërbimit.

3. Formulari i procesverbalit të konstatimit të shkeljes është dokument me vlerë (bllok gjobash ose procesverbalesh) me numër serie progresive, në katër kopje, nga të cilat kopja e parë dorëzohet në sektorin ose seksionin e buxhet-financës të komisaritit ose drejtorisë (sipas strukturës), kopja e dytë i jepet kundërvajtësit, kopja e tretë kalon për evidentim në seksionin e Policisë Rrugore ose kartotekën (sipas strukturës) dhe kopja e katërt ngelet në bllok dhe i dorëzohet administratorit të letrave me vlerë (magaziner, kujdestar, arkëtar sipas strukturës).

4. Për kundërvajtjet, objekt i të cilave janë mjetet me targa të huaja, arkëtimi i gjobës të bëhet në vend nga punonjësi i Policisë Rrugore, i patrullës së përgjithshme ose, në pamundësi të kryerjes së pagesës, të bëhet bllokimi i dokumentacionit (lejedrejtimi, lejeqarkullimi, siguracion) i konfirmuar me dokument zëvendësimi deri në momentin e shlyerjes së detyrimit.

Seksioni ose sektori i buxhet-financës merr masat për pajisjen e punonjësve me mandat arkëtimi, i cili hartohet në tri kopje: një kundërvajtësit, një kopje së bashku me procesverbalin dorëzohet në financë dhe një kopje në bllok.

Derdhja e shumës së vjelur të kryhet në arkën e institucionit, jo më vonë se 24 orë nga momenti (data) i vendosjes.

5. Administrimi financiar i procesverbaleve (maturimi, regjistrimi i arkëtimit, kontabilizimi dhe pasqyrimi në evidencat dokumentare dhe elektronike kur ato janë të miratuara) të bëhet në seksionin/sektorin e buxhet-financës të institucionit në të cilin agjenti verifikues është punonjës, sipas kërkesave të ligjit nr.9228, datë 20.4.2004 “Për kontabilitetin dhe pasqyrat financiare”, i ndryshuar.

6. Në formularin e mandatarkëtimit që lëshojnë operatorët financiarë, për procesverbalet e konstatimit të shkeljes së Policisë Rrugore dhe të patrullës së përgjithshme, të jenë të evidentuara: emri, mbiemri i personit që kryen arkëtimin, seria e procesverbalit, data, targa, masa e gjobës, kamatëvonesa, shkelja e kryer, emri dhe mbiemri i punonjësit të policisë që ka vendosur gjobën, si dhe rrethi ku është konstatuar shkelja. Për rastet e vendimeve të komisionit në mandat të shënohet dhe numri i vendimit, data, vlera (e ndarë nga procesverbali në vlerë), si dhe minimalisht të jenë dy kopje në dispozicion të qytetarit.

7. Shefi i seksionit të Policisë Rrugore organizon vjeljen e gjobave të prapambetura pas konfirmimit nga seksioni/sektori i buxhet-financës për kalimin e afatit ligjor për pagesë të vullnetshme mbi 1 muaj (procesi është i shtrirë gjatë vitit kalendarik). Seksioni/sektori i buxhet financës dhe seksioni i Policisë Rrugore të bëjnë çdo ditë aktrakordimin me operatorët financiarë që kryejnë shërbimin e arkëtimit të gjobave të vendosura, por në asnjë rast të mos kalojë 2 ditë pune.

Aktrakordimi të jetë në raste dhe vlerë, ku vlera të jetë analitike gjoba, kamatëvonesa. Për gjobat e vendosura dhe të paarkëtuara në afat të aplikohet kamatëvonesë në masën 2% të gjobës për çdo ditë vonesë deri në 1 muaj (30 ditë).

8. Sektori/sektori i buxhet-financës, për debitorët me banim jashtë qarkut i dërgon njoftim komisarariatit të Policisë të rrethit përkatës, sipas formularit bashkëngjitur udhëzimit çdo muaj, kur nuk është i mundur dërgimi direkt me sisteme informatike. Komisaritati që merr njoftimin për debitorët banorë në rrethin e tij, përpilon pasqyra të veçanta në regjistra ose sisteme informatike të miratuara, ngarkon seksionin e Policisë Rugore dhe të patrullës së përgjithshme për arkëtimin e tyre dhe në momentin e arkëtimit bën maturimin dhe kontabilizimin e tyre. Për gjobat e arkëtuara jo më vonë se dhjetë ditë i dërgohet konfirmimi komisarariatit që ka përpiluar procesverbalin dhe seksioni/sektori i buxhet-financës sipas aktit të konfirmimit, i cili përmban emrin dhe mbiemrin e kundërvajtësit, serinë e gjobës, datën, targën, numrin dhe datën e mandatarkëtimit, vlerën e gjobës, vlerën e kamatës për arkëtimin që kryejnë operatorët financiarë në rrethin e një komisaritati ose drejtorie tjetër në varësi të strukturave, kryen çdo ditë çregjistrimin e tyre nga sistemi dhe kryen kontabilizimin duke pakësuar detyrimin për shumën e akëtuar.

9. Vjelja e gjobës që ka kaluar afatin ligjor të kryhet sipas ligjit nr.7697, datë 7.4.1993 “Për kundërvajtjet administrative”, neni 19, ndërsa kur shkelësi është pronar dhe drejtues mjeti me motor, zbatohet neni 203 i Kodit Rugor të Republikës së Shqipërisë.

10. Gjobat e arkëtuara (edhe ato që u përkasin rretheve) të derdhen në degën e thesarit të rrethit nga operatorët financiarë që kryejnë arkëtimin e gjobave me pjesëmarrje 40% buxheti dhe 60% institucioni.

11. Çdo muaj seksioni ose sektori i buxhet-financës dhe seksionet e Policisë Rugore të paraqesin pranë drejtorive përkatëse në DPPSH, statistikën e gjobave të shërbimeve të Policisë Rugore, patrullës së përgjithshme dhe Komisionit Administrativ të Shqyrtimit të Kundërvajtjeve mujore dhe progresive jo më vonë se data 10 e muajit pasardhës.

12. Udhëzimi nr.1105, datë 1.11.1999 “Mbi mënyrën e administrimit të gjobave të vëna ndaj kundërvajtësve nga shërbimet e Policisë Rugore”, shfuqizohet.

13. Ngarkohen Drejtoria e Përgjithshme e Policisë së Shtetit dhe njësitë shpenzuese në përbërje të programit “Policia e Shtetit” për zbatimin e këtij udhëzimi.

14. Sekretari i Përgjithshëm i Ministrisë së Brendshme, në cilësinë e nëpunësit autorizues, ndjek zbatimin e këtij udhëzimi.

Ky udhëzim hyn në fuqi pas botimit në Fletoren Zyrtare.

MINISTRI I BRENDSHËM
Lulzim Basha

FORMULARI I GJOBAVE TË ARKËTUARA NGA ENTI PËR KRYERJEN E PAGESAVE

Nr.	Data e njoftimit me faks	Emri, mbiemri i kundërvajtësit	Nr.Kodik i regjistrimit	Komisariati i Policisë	Automjeti			Kundërvajtje		Seria e gjobës	Vlera e gjobës	Kamtë vonesa	Shpenzimet e njoftimit	Detyrimi i kundërvajtësit	Mandat-arkëtimi	
1.					Marka	Tipi	Targa	Data	Lloji						Nr	Datë
1	2	3	4	5	6	7	8	9	10	11	12	13	14	15	16	17
2																
3																

REGJISTRI I DEBITORËVE ME VENDBANIM JASHTË RRETHIT

Nr	Kundërvajtësi		Pronari i mjetit		Targa e automjetit	Emri, mbiemri i policit	Lloji i shkeljes	Fleta e gjobës			Vërejtje
	Emër,mbiemër	Adresa	Emër, mbiemër	Adresa				Nr.serisë	Data	Vlera	
1	2	3	4	5	6	7	8	9	10	11	12
1											
2											
3											

